

Sanaartornermi ilinniartoqartarneq pillugu Namminersorlutik Oqartussat nalunaarutaat nr. 10, 12. juli. 2010-meersup allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffissaattut siunnersuut, taamaalilluni Nalunaarummi pineqartumi neqerooruteqartitsisup neqerooruteqarnissamut najoqqutassani piumasaqaatigineqartut amerlillugit sanaartugassap minnerpaamik 12 mio. koruuninik naleqarpat ilinniartut sisamat atorfinitsinneqassasut taamatuttaaq sanaartugassaq minnerpaamik 15 mio. koruuninik naleqartillugu ilinniartut tallimat atorfinitsinneqassasut.

(Inatsisartuni ilaasortaq Per Berthelsen, Siumut)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Siunnersuummi matumani siunertaasut Naalakkersuisut tamakkiisumik tapersorsorpaat, kisiannili siunnersuutip imaanut aalajangersimasunut oqaaseqaatissaqarlutik. Taakku matuma kinguliani nassuiaatigissavakka.

Siullermilli ataatsimiinnermi matumani oqaluuserisassani nr. 100-mi inatsisissatut siunnersuut, Naalakkersuisunit saqqummiunneqartoq qiviaqqussavara. Tassani pineqarpoq ”Sanaartornermi neqerooruteqartitsisarneq pillugu Inatsisartut inatsisaata allanngortinneqarnissaannik Inatsisartut inatsisissaattut siunnersuut, ulluinnarni neqerooruteqarnermut inatsisitut taagorneqartoq.

Inatsisissap suliniutigineqarnerani suliassamik tunniussisoqartillugu pisortanit neqerooruteqartitsisut neqerooruteqartitsisullu allat, neqerooruteqarnermut inatsimmi aalajangersakkanut ilaatinneqartut – akiusoq kisiat isiginiarnagu – inuiaqatigiit aningaasaqarnerannik aallaaveqartunik ilaatitsisarnissaat siunertaasuni pingaarnersaavoq.

Neqerooruteqartitsisup neqerooruteqartitsinermi suliassap aalajangersimasup suliarineqarnissaanut ilinniartunik sapinngisamik amerlanerpaanik atorfinitsitsinissaanik kissaateqarneq tassunga assersuutigineqarsinnaavoq. Tassalu sanaartornissamut isumaqatigiissut pillugu unammillertitsinermi suliffeqarfinni ilinniarfissanik arlalinnik pilersitsisarnissamut neqerooruteqartut kajumissaarneqartassapput.

Apeqqutit attuumassuteqartut, Akileraartarnermut Atugarissaarnermullu Ataatsimiititaliap isumaliutissiissutaanni saqqummiunneqartut inatsisissatut siunnersuutip atuutsinneqalernerani saqqummiunneqarluarsinnaasut Naalakkersuisut isumaqarput.

Inatsisissamik suliniuteqarnikkut Per Berthelsenip sanaartornermi ilinniartunik atorfinitsitsinissamut piumasaqaatit sukannerulerinneqarnissaannik kissaateqarnera Naalakkersuisut taamaalillutik akuersaarpaat.

Ilinniartoqarnermut nalunaarummi, Per Berthelsenip allanngortinneqartussatut siunnersuutigisaani pisortat sanaartugaanni imaluunniit sanaartukkani pisortanit

tapiiffigineqartuni 3 mio. koruunit sinnerlugit naleqartuni ilinniartunik atorfinitsitsinissamik piunasaqaatit minnerpaaffissaat aalajangersarneqarpoq. Suliffeqarfiit pisortat sanaartugassaataannik imaluunniit sanaartugassanik pisortanit tapiiffigineqartunik suliaqartut tamarmik piunasaqaatit minnerpaaffissaannut ilaatinneqarput, taassumalu – sananermut akiusoq apeqqutaatillugu – ilinniartunik ikinnerpaamik pingasunik atorfinitsitsinissaq kingunerisinnaavaa.

Kisiannili suliffeqarfinit, pisortat sanaartugassaataannut akuerineqartunit amerlasuut ilinniartunik atorfinitsitsinissamut piunasaqaatinik naammassinnereersimasarput. Taamaattumik ullumikkut ilinniartunut nalunaarut sunniuteqavissimanersoq ilisimaneqanngilaq.

Ilinniartunut nalunaarut sukannernerulersillugu allanngortinneqannginnerani tamanna eqqarsaatigineqartariaqarpoq.

Neqerooruteqartup suliaqartut pissarsiarinnaassappagu, suliffeqarfimmi ilinniartut aalajangersimasumik amerlassusillit atorfeqartinneqarnissaat ilinniartunut nalunaarummi taamaallaat piunasaqarpoq. Aaqquussineq suliffeqarfinit eqaatsumik atorneqarsinnaavoq, tassami ilinniartut suliavit naammassilersumiit suliassamut neqerooruteqarfigitinneqartumut nuutsinneqarsinnaapput. Taamaalilluni suliffeqarfiit nutaanik atorfinitsitsinissamik pinngitsuusinnaapput.

Tamanna pissutigalugu sanaartugassanut neqerooruteqartitsivigineqartunut ilinniartunik qanoq amerlanerutigisunik atorfinitsitsisoqartarnersoq nalorninarsisarpoq.

Kiisalu pissutsit sulianut tunngassuteqartut arlallit eqqarsaatigineqartariaqarput:

Ilinniartut amerlassusaat suliunut suliassamik isumaginnittussanut tamarmiusunut naleqqiullutik naleqquttussaapput.

Kiisalu neqerooruteqartoq suliassap suliarinissaanut piffissap atorneqartup saniatigut pisussaaffilerneqarsinnaanngilaq.

Tamatuma saniatigut Naalakkersuisut maannakkorpiat ilinniartut suliffeqarfimmi misiliilluni sulinissamut ajornartorsiuteqarnerisa aqqinneqarnissaanut pilersaarutissatut siunnersuummik ataatsimoortumik suliaqaleruttorput. Taanna suliniutissanik arlalinnik, ajornartorsiutinut inuusuttorpassuit inuusutissarsiornermut ilinniagaqalernissaannut akimmisaarfiusartunut qaangiiniarnermi ingerlanneqartussanik imaqassaaq. Taanna ilaatigut suliassanut ilinniarfiit siulersuisui suleqatigalugit suliarineqarpoq.

Tamatumunnga paasinnineq tunngavigalugu aammalu oqaluuserisassani nr. 100-mi inatsisissatut suliniutissaq taaneqartoq eqqarsaatigalugu ilinniartunut nalunaarutip sukannernerulersinneqarnissaanik siunnersuut itigartinneqassasoq Naalakkersuisut inassutigaa.